

# 23 siswa UTHM ditauliah pangkat Timbalan Penguasa Kanan Relasis

**BATU PAHAT 5 Mei** - Seramai 23 mahasiswa Universiti Tun Hussein Onn Malaysia (UTHM) menjadi kumpulan pertama pasukan Rela Siswa Siswi (Relasis) yang ditauliahkan dengan pangkat Timbalan Penguasa Kanan Relasis.

Dalam sesi pentauliahkan yang diadakan baru-baru ini, empat kakitangan termasuk Penolong Naib Canselor UTHM, Prof. Datuk Dr. Abdul Razak Omar turut menerima pangkat bersekutu Jabatan Sukarelawan sebagai komander brigid tersebut di universiti terbabit.

Majlis tersebut disempurnakan oleh Timbalan Ketua Setiausaha Dasar Keselamatan Kementerian Dalam Negeri, Datuk Seri Adenan

Ab. Rahman di Dewan Sultan Ibrahim, UTHM.

Yang turut hadir, Ketua Pengarah Rela, Lukeman Saaid dan Naib Canselor UTHM, Prof. Datuk Dr. Mohd. Noh Dalimin serta ketua-ketua jabatan kerajaan peringkat daerah.

Sementara itu, Adenan dalam ucapannya mengingatkan mahasiswa yang ditauliahkan tersebut agar memikul amanah sebagai sukarelawan rakyat yang berada pada barisan paling hadapan dalam membantu menangani krisis keselamatan, kecemasan atau bencana.

"Mereka juga turut ditauliahkan untuk menjadi perantara dan jurulatih bagi menyalurkan ilmu, maka pikul amanah tersebut sebaik-baik-

nya dan saya berharap sumbangan dan keperibadian tinggi menjadikan Brigid Relasis setanding dengan badan beruniform lain.

"Selain persiapan yang telah dilakukan Rela, saya berharap setiap ahli yang terlatih dengan ilmu Relasis dapat memainkan peranan masing-masing dalam membantu mereka yang memerlukan di sekeliling kita," katanya.

Tambah Adenan, penyediaan landasan awal kepada siswa dengan menyemai nilai untuk berkhidmat kepada masyarakat dan negara secara tidak langsung akan memupuk nilai kesukarelaan dan kesiapsiagaan yang tinggi untuk berkhidmat apabila tenaga mereka diperlukan.



**ADENAN AB. RAHMAN** (dua dari kanan) menyampaikan watikah pentauliahkan Timbalan Penguasa Kanan Relasis kepada mahasiswa UTHM sambil diperhatikan oleh Mohd. Noh Dalimin (tengah) dan Lukeman Saaid (dua dari kiri) di Dewan Sultan Ibrahim, UTHM, Johor, baru-baru ini.